



23. januar 2015

UPA 2015/121

Inatsisartut suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Kalaallit Nunaata Aatsitassarsiornermi Aningaasaateqarfia pillugu Inatsisartut inatsisaata nr. 6, 5. december 2008-meersup allanngortinneqarnissaanut Naalakkersuisut peqquneqarnissaannut Inatsisartut aalajangiiffigisassaattut siunnersuut, imaalillugu Inatsisartut ukiut tulleriissut aappassaanni nunatta karsiata naatsorsuutaanik aatsaat akuersereeraangata aningaasaateqarfik aallartinneqartassasoq, aatsaallu ukiumi naatsorsuiffiusumi aatsitassanit isertitat 10 millioner kroninit annertunerusimappata. Inatsisartut inatsisaat ukiup tullissaani 1. januarimi atuutilissaaq imaluunniit Naalakkersuisut aalajangiippata siunnersusukkut. 10 millioner kronit taaneqartut Inatsisartut ukiumi pineqartumi Aningaasaqarnermut inatsisaat naapertorlugu ataatsimut isigalugu akit akissarsiallu nalingannut naleqqussarneqartassapput.

(Inatsisartunut ilaasortaq, Naaja Nathanielsen, Inuit Ataqatigiit)

Tungavilersuut

2012-mi upernaakkut ataatsimiinnermi Naalakkersuisuusimasut aatsitassarsiornermi aningaasaateqarfiup atuutsinneqalartarnissaanut aningaasat 5 millioniit 75 millioninut qaffanneqarnissaannik siunnersuuteqarput. Taamanikkut Naalakkersuisut inatsimmut siunnersuutaannut Inuussutissarsiornermut Ataatsimiititaliamit allannguutissamik siunnersuuteqartoqarpoq.

Aningaasaateqarfiup ingerlanneqarnissaanut aningaasartuujumaartussat eqqarsaatigalugit Inuussutissarsiornermut Ataatsimiititaliap 5 millionit annikinaagaasimassasut miserratiginngilaa.

Taamatuttaaq Inuussutissarsiornermut Ataatsimiititaliap akuersaarpaa aatsitassarsiornermit isertitat aallaqqaammut allanngorartuunissaat naatsorsuutigineqartariaqartoq.

Inuussutissarsiornermulli ataatsimiititaliap aningaasat 75 millioninut qaffanneqarnissaannut tunngavissaqanngitsoq nalilerpaa.

Tamanna tunngavigalugu Inuussutissarsiornermut ataatsimiititaliap sukumiisumik isumaliutissiissuteqarnermigut (EM/2012/52), aningaasat 5 millioniniit 10 millioninut qaffanneqarnissaat siunnersuutigivaa, ilanngullugulu siunnersuutigalugu aatsaat aatsitassarsiornermut ataatsimiititaliaq ukiut tulleriissut aappassaanni 10 millionit sinnerlugit isertitaqaraangat tamanna pisassasoq.

Qinersisoqannginnerani pisaq naammassineqanngitsoorpoq. Taamaattumik taamanikkut Inuussutissarsiornermut ataatsimiititaliap siunniussaata kissaataatalu naammassineqarnissaat anguniarlugu aalajangiiffigisassatut siunnersuut manna saqqummiuppara.

Pisortani aningaasatigut allaffissornikkullu kingunissai

Inatsisip pioreersup iluarsineqarnissaa pineqarmat inatsisissamut siunnersuutip suliarineqarnissaanut aningaasartuutit killeqarnissaat nalilerneqarpoq.

Aningaasaateqarfiup annikippallaanik aningaasaateqarluni aallartinneqarnissaa pinngitsoortinneqassammat siunnersuut aningaasatigut iluaqutaassaaq. Akerlianik aningaasaateqarfiup ingerlanneqarnissaa aningaasaqarnermut inatsimmit akilersorneqaleratarsinnaavoq.

Taamaattumik Namminersorlutik Oqartussat taamatut inissinginnissaat anguniarluguttaaq aalajangiiffigisassatut siunnersuut manna saqqummiuppara.

Namminersortuni aningaasatigut allaffissornikkullu kingunissai

Piffissaq qaninnerusoq ungasinnerusorlu isigalugit soqanngilaq

Innuttaasuni aningaasatigut allaffissornikkullu kingunissai

Soqanngilaq